

15 AUG 1996

UMNO-Kerjasama

UMNO KELANTAN SEDIA KERJASAMA DENGAN PAS-S46 BAGI KEPENTINGAN RAKYAT

KOTA BAHARU, 15 Ogos (Bernama) -- UMNO Kelantan sentiasa mengamalkan pendekatan terbuka dalam menangani isu-isu tempatan demi untuk kepentingan rakyat negeri itu termasuk kemungkinan bekerjasama dengan Pas dan Parti Melayu Semangat 46 (S46), kata Timbalan Pengerusi Badan Perhubungan UMNO Datuk Annuar Musa.

Katanya bagi kepentingan bersama, UMNO Kelantan beranggapan semua perkara yang menjadi asas dan prinsip parti termasuk yang membabitkan masa depan politik negeri, perpaduan Melayu dan institusi istana perlu ditangani dengan bijaksana dan tidak secara terburu-buru.

Sehubungan itu, UMNO tidak menolak kemungkinan bekerjasama dengan PAS dan S46 dalam bidang-bidang tertentu dalam menghadapi isu tempatan di Kelantan, katanya kepada pemberita di sini hari ini.

Annuar berkata berdasarkan pilihan yang ada itu pihaknya bersedia melaksanakan apa sahaja pilihan yang terbaik demi untuk kepentingan rakyat.

Bagaimanapun mana-mana pilihan itu tertakluk kepada persetujuan dan keputusan muktamad oleh pucuk pimpinan parti khususnya oleh Presiden Datuk Seri Dr Mahathir Mohamad.

Annuar turut memberi contoh bagaimana kerjasama antara Pas-UMNO boleh membantu rakyat apabila beliau sendiri menyokong permohonan Menteri Besar Kelantan Datuk Nik Aziz Nik Mat yang meminta bantuan Dr Mahathir supaya kerajaan pusat dapat menaikkan taraf Lapangan Terbang Sultan Ismail Petra, di sini serta melaksanakan projek pembinaan lebuh raya Pantai Timur membabitkan Kelantan.

"Malah UMNO sendiri pernah mengemukakan permohonan yang serupa kepada kerajaan pusat tidak lama dahulu," katanya.

Katanya langkah menjadikan lapangan terbang itu bertaraf antarabangsa juga dapat menarik rakyat Islam Selatan Thai untuk ke Jeddah bagi menunaikan ibadat Haji dengan menggunakan kemudahan di sini.

Beliau juga berkata Kabinet sendiri sudah mengarahkan Unit Perancang Ekonomi di Jabatan Perdana Menteri supaya membuat kajian mengenai permohonan projek itu, membabitkan beberapa aspek seperti kewangan, kesesuaian dan keutamaan.

-- BERNAMA

FI AKD